

Cart Nech De'en Bzoj San Pabən' Par Benə' Tesalonica Cā'

Pabən' len benə' ljuēžje' ca' bos'o'zoje' benə' ca' chso'elaogüe'e Jesocristən'

¹ Nada' Pab chzoja' le'e nitə'əle Tesalonican', le'e chdopə chžagle cho'ela'ole Xacho Diozən' na' Xancho Jesocristən' laogüe de'en ngodə'əle txen len lega'aque'. Na' nada' lena' Silbano na' Temtion' chḡabto' lao Xacho Diozən' na' lao Xancho Jesocristən' əsa'aclene' le'e na' so'one' ca so cuezle binlo len xbab de'en yo'o lo'o yichjla'ažda'olen'.

Besə'əloe' benə' Tesalonica ca' de que chso'onlilaž'e Jesocristən'

² Yoguə' laste catə' chonto' orasyon cho'eto' yelə' choxcwlen che Diozən' par yoguə'əle, na' chḡabto' gaquəlene' le'e.

³ Na' catə' chonto' orasyon lao Xacho Diozən' chjsa'alažə'əczəto' yoguə'əloł de'e güen de'en chonle laogüe de'en chonlilažə'əle Diozən' na' chaquəle che'. Na' chjsa'alažə'əczəto' can' chgo'o chchejlažə'əle catə'n chzaquə'əzi' chzaquə'əyašə'əle chedə' zole lez yidə Xancho Jesocristən' yeto.

⁴ Nezeto' benə' bišə', de que Diozən' chaquene' chele na' bagwleje' le'e par nacle xi'ine'.

⁵ Na' Spirit che Diozən' goclenən le'e len yelə' guac chein' par nich gwnezele de que dižə' güen

dižə' cobə de'en bzejni'ito' le'e che Jesocristən' naquən de'e li. Caguə naquən con to dižə'. Na' nezczele can' bentezə bento' de'e güen entr le'e par nich goclento' le'e.

⁶ Na' le'e zole chonle can' bento' na' can' ben Xancho Jesocristən'. Nə' Spirit che Diozən' chonən ca chebeile la'anə'əczə de'e zan de'e bagwdi' bagwxaquə'əle por ni che de'en babzenagle de'en gwduxjue'ito' le'e che Jesocristən'.

⁷ Beṇə' ca' chso'onlilažə' Jesocristən' Masedonian' na' Acayan' bazjəneze' can' chonle na' de'e na'anə' zjəneze' naquən' cheyalə' so'one'.

⁸ Babenle ca zjəneze beṇə' che Xancho Jesocristən' chedə' doxenlən' banasə' nɫaljən, caguə Masedonian' na' caguə Acaya na'azən'. Na' le'egatezə ca' yoguə'əzə beṇə' bazjəneze' can' chonlilažə'əle Diozən', na' de'e nan' bitoch bi de ənato' chele.

⁹ Na' beṇə' zan chso'e dižə' ca güennə' benle len neto' catə'ən bedalanə'əto' le'e na' can' goquə gwzola' chonlilažə'əle Diozən'. Bagwlejyichjle cuich chejni'alažə'əle lgua'a lsaquə' chele ca' na' n'a' bachonlilažə'əle Diozən', na' bacho'ela'ole Diozən' ben' zo zejlicane. Len' zaquə' par güe'ela'ocho.

¹⁰ Na' chso'e dižə' can' chbezle əchoj Xi'ine' Jeso'osən' yoban' yide' yežlyo nga yetlas, be'en bosban Diozən' ladjo beṇə' guat ca'. Na' de'en chonlilažə'əcho Jeso'osən', Diozən' bito gone' chio'o castigw catə'ən əžin ža gone' castigw zejlicane che beṇə' ca' cui chso'onlilažə' Jeso'osən'.

2

Xšin Diozən' de'e ben Pabən' Tesalonican'

¹ Le'e nezczele beṇə' bišə', catə'an bedalaṇə'əto' le'e na' gwɔdixjue'ito' le'e dižə' güen dižə' cobə che Diozən' zochgua yelə' guac che'enə' len neto'.

² Nezele can' gwɔdi' gwxaquə'əto' Filiposən', can' bosə'ožia bosə'onitə' beṇə' ca' neto' lao gwɔdixjue'ito' che Jesocristən'. Pero na' Diozən' bene' ca cui bžebto' gwɔdixjue'ito' le'e dižə' güen dižə' cobə che'enə' la'anə'əczə de'e zan de'e besə'əžon par chixjue'eto'on.

³ De'en chatə'əyoito' le'e gwzenagle che Diozən', bito ṇacho chonto' clelə na' nic chzelažə'əto' gonto' bi de'e mal, na' nic chene'eto' əxoayagto' le'e.

⁴ Diozən' nezene' de que zotezə zoto' chzenagto' che', na' de'e na'anə' gwleje' neto' par chyixjue'eto' dižə' güen dižə' cobə che'enə'. Ca' chaquən' chzeneto'on le'e. Chyixjue'ito'on le'e caguə par nič yebei beṇə' de'en chonto' na'anə', sino par nič yebei Diozən' can' chonto'onə'. Le' nezene' yoguə'əte xbab de'en yo'o lo'o yičhja'ažda'ochon'.

⁵ Nezele can' chonto', ni šlinzə cuiṇə' gwpeito' le'e len dižə' de'en cho'eto'onə', na' niqenə' xoayagto' le'e par nič gonle neto' bi de'en de chele. Cuin Diozən' nezene' de que can' naquən.

⁶ Na' nic chyiljažə'əto' naclə gonto' par nič əso'elao' beṇə' neto'. Niqe əṇacho chene'eto' par nič le'e güe'ela'ole neto', na' nic chene'eto' yeziquə'əchlə beṇə' əso'ela'ogüe'e neto'. Zaquə'əto' par gonto' ca gwzenagle cheto' la fuers por ni che de'en bselə' Cristən' neto' par cho'eto' xtiže'enə', pero bito chonto' ca gwzenagle cheto' la fuers.

⁷ Nži'ito' le'e caczə nži'i to no'olə xi'ine' bi'i chosgol chosča'ogüe'.

⁸ Na' de'en chaqueto' chele, cho'elento' le'e dižə'

güen dižə' cobə che Diozən'. Na' caguə de'e na'azən' chonto', sino leczə chsanlažə' cuinto' chonto' xte ga zelao chzaque'eto' par chaclento' le'e chedə' chaqueto' chele.

⁹ Za'alažə'əcze beṇə' bišə', catə'an gwzoto' len le'e lechguale bento' žin xte jxaque'eto' par ben cuinto' mantener. Bento' žin teža na' do še'elə par nič cui bi gast əbzoto' le'e. Can' bento' gwduxjue'ito' le'e dižə' güen dižə' cobə che Diozən'.

¹⁰ Txenczən' nacle len Diozən' nezele ca güenṇə' bento' catə'an gwzolento' le'e chonlilažə'əle Jesocristən'. Benczəto' con can' chazlažə' Diozən'. Bento' par nič ni to cui no gwna de que napəto' dolə'.

¹¹ Nezele can' gotə'əyoito' le'e gwzenagle che Diozən' na' can' əbtipto' lažə' to tole can' chon to beṇə' byo len xi'ine'.

¹² Bento' mendad de que gonšgacze de'e güen can' cheyalə' gon chio'o bagwlej Diozən' par ṇabi'e chio'o na' par gone' chio'o yelə' bala'an.

¹³ Bito chbezəto' cho'eto' yelə' choxcwlen che Diozən' can' bzenagle xtiže'enə' catə'an gwduxjue'ito'on le'e. Zacbe'iczele bito naquən xtižə' beṇachən' sino naquən dižə' de'en chon Diozən' par cho'eto'. Na' de'en gwyejle'ele xtižə' Dioz na'anə' chša'an xbab de'en yo'o lo'o yichjla'ažda'olen'.

¹⁴ Beṇə' bišə', le'e bagoc chele can' goc che beṇə' ca' chəsə'ədopə chəsə'əžag cho'elaogüe'e Jesocristən' zan part Jodean', beṇə' ca' chso'onlilažə' Jesocristən' ca chio'o chonlilažə'əchone'. Na' le'egatezə ca' baboso'oči' boso'osaguə' beṇə' Izrael ca' beṇə' gwlaž

chega'aque' ca' chso'onlilažə' Jesocristən', na' can' bos'o'chi' bos'o'saquə' beṇə' gwlaž chele ca' le'e.

15 Beṇə' Izrael ca'anə' gwso'ote' Xancho Jeso'osən' can' gwso'ote' beṇə' ca' gwso'elene' lega'aque' xtižə' Diozən' cana'. Na' leczə can' gwso'one' bos'olagzejə bos'olagzide' neto'. Na' xte ža neža por de'e cui chazlažə' Diozən' chso'one', na' leczə chso'one' contr yoguə'əloḷ beṇə'chən'.

16 Beṇə' Izrael ca' choso'ožone' əgwzejni'ito' beṇə' cui zjanaquə beṇə' Izrael bi de'en cheyalə' goncho par nič cui yeyejcho lao yi' gabilən'. Can' chso'one' de'e na'anə' do tyemp choso'ozanch xtola'əga'aque'enə'. Bagwchoglao Diozən' chęga'aque' de que zejlicaṇe yesə'əzi'e castigon'.

Pabən' gone'ene' žjezlane'e beṇə' ca' nitə' Tesalonican'

17-18 Na' neto' beṇə' bišə', bachacchgüeito' chedə' bitochənə' le'i ljuežjcho, pero chonto' xbab chele. Nada' Pab zan las go'onda' delaṇa'a le'e, na' bchoj catə' beyiljlažə'əto' naclə gonto' par nič yežagcho de'e yoblə. Pero catə' gone'eto' yidəto' par delaṇə'əto' le'e, Satanasən' de'en chnabia' de'e xio' ca' bito be'en latjə.

19 Zoto' lez sotezə sole gonlilažə'əle Xancho Jesocristən'. Na' leczə chebeito' can' chonlilažə'əlene' ṇa'a. Na' catə'ən yide' yeto, soto' mbalaz güe'eto' dižə' can' chonlen'.

20 Le'e chonle ca si'ito' yelə' bala'an na' le'e chonle ca zoto' mbalaz.

3

1-2 Na' cuich bchejeto' laogüe de'en cui chle'i ljuežjchon'. De'e na'anə' bselə'əto' beṇə' bišə'əcho

Temtion' gan' zolenə' na' bega'an netəzəto' Atenas nga. Temtion' naque' beṇə' güen xšin Diozən' na' chone' txen len neto' chyixjue'eto' dižə' güen dižə' cobə de'en chzejni'in beṇə' che Cristən'. Bselə'əto'one' btipəche' lažə'əle na' bedəyene' ca benlilažə'əchle Cristən'.

³ Bselə'əto'one' gan' zolenə' par ničh ni tole cui gaquəžejlažə'əle bixchen' chyi' chzaquə'əle, chedə' la' baṇezele Diozən' nsi'e xneze techo yelə' yašə' yelə' zi' yežlyo nga.

⁴ Catə'an gwzolento' le'e antslə bzeneto' le'e de que yoso'ochi' yoso'osaquə' beṇə' chio'o. Na' nezele de que bachac can' gwnato'onə'.

⁵ Na' laogüe cuich chčejda' de'en cuichəṇə' le'i ljuežjcho, bselə'a Temtion' gan' zolenə' par ničh gwneзда' šə zdaczle chonlilažə'əle Cristən'. Go'onda' əneзда' šə bagwzoi gwxiye'enə' bxoayaguən le'e. La' šə babxoayaguən le'e, bendadto' xšin Dioz na'anə' entr le'e šə ca'.

⁶ Beyacxenləžə'əteto' catə' belə' Temtion' de'en bide' gan' zolenə'. Bedəyzejni'ine' neto' ca güennə' chonle chonlilažə'əle Cristən' na' chaquele che yoguə'əlol beṇə'. Na' leczə gwne' can' chi' yičhje neto' na' can' zelažə'əle yežagcho de'e yoblə leczə can' chene'e neto'.

⁷ Ca'aczən' beṇə' bišə', ne'e chžaglaoto' na' ne'e chyi' chzaquə'əto' pero babeyondiplažə'əto' gwnezetto' de que zotezə zole chonlilažə'əle Cristən'.

⁸ De'e li babeyacxenləžə'əto' na' zoto' mbalaz de'en zotezə zole chonlilažə'əle Xancho Cristən'.

⁹ Na' de'e na'anə' lechguale chebeito' lao Diozən' can' chonle na' cho'echguato' yelə' choxcwlen che' can' chaclene' le'e.

10 Lechgualē chonto' orasyon do ža do yel chṇabeto'one' gone' ca le'i ljuežjcho niḥ əgwzejni'icheto' le'e par niḥ šejəchle gonlilažə'əchlēne' chedə' bitonə' gonlilažə'əlene' can' chene'e Diozən'.

11 Chṇabeto' Xacho Diozən' na' len Xancho Jesocristən' əso'e latjə yedəzlanə'əto' le'e.

12 Na' chṇabeto' Xancho' gone' ca gaquəche che ljuežjle tole yetole na' gone' ca gaquəchele che yoguə' beṇəḥ con catezən' chaqueto' che le'e.

13 Chṇabczəto'one' gone' ca gaquə la'ažda'olen' xi'ilažə' lao Xacho Diozən' sin cui bi dolə' gaple catə'ən yidə Xancho Jeso'osən' de'e yoblə nche'e yoguə'əlol beṇə' bagwlej Diozən' par zjənaque' lažə' ne'ənə'.

4

Pabən' bzejni'ine' can' chene'e Diozən' yesə'əzo yesə'əbeze'

1 Na'a ža beṇə' bišə', baḥ bsed blo'ito' le'e gonle can' chene'e Diozən', na' baḥ zole chonle ca'. Na' de'en chonlilažə'əle Xancho Jesocristən' chatə'əyoito' le'e na' chonto' mendad əžja'acquəchle gonchle de'en chene'e Diozən'.

2 Baṇezczele de que de'en bento' mendad gonle naquən de'en na Xancho Jeso'osən'.

3 Diozən' chene'ene' sotezə socho gaccho beṇə' la'aždao' xi'ilažə'. Na' bito chene'ene' cuejyichjcho no'ol checho o be'en checho par solencho beṇə' yoblə, na' bito chene'ene' əgwža' xtocho.

4 Na' leczə chene'ene' əneze totole naquən' cheyalə' chiljle xo'ollen' sin cui gaple dolə' na' sin cui no əṇa de que chonle de'e mal.

⁵ Bito gonlebele beṇə' ca cui chso'onlilažə' Diozən' na' čiljle xo'olle par gonle can' chzelažə' la'ažda'omallen', sino čiljlene' par solenlene' can' chene'e Diozən'.

⁶ Ni tole bito cheyalə' solenle no'ol che beṇə' yoblə čhedə' la' contr be'en che' na' gonle šə gonle ca'. Babe'eto' dižə' antslə par bosnieto' le'e de que Xanchon' chnežjue' castigw che beṇə' chso'on bitə'ətezə de'e malən' zjənac ca'.

⁷ Diozən' gwleje' chio'o par gaccho beṇə' la'aždao' xi'ilažə', caguə par co'o xtocho o goncho bichlə de'e mal ca' zjənac ca'.

⁸ De'e na'anə notə'ətezle šə nacle beṇə' gode-nag len de'e ca' chsed chlo'ito' le'e, che Dioz nan' cui chzenagle, caguə che netəzəto'. Le'enə' beṇe' chio'o Spirit che'enə' čhedə' chene'ene' gaccho beṇə' la'aždao' xi'ilažə'.

⁹ Bito chyažjele gwzoja' le'e par ənezele de que cheyalə' gague che ljuežj chio'o chonlilažə'əcho Diozən'. Dioz na'anə' babsedene' le'e par nič chaque che ljuežjle tole yetole.

¹⁰ Na' can' bachaquele che yoguə' beṇə' bišə'əcho ca' nitə' doxen Masedonian'. Na' chatə'əyoito' le'e beṇə' bišə', legaquəche čega'aque'.

¹¹ To tole le'e yeyiljlažə' nacle'n gonle žin par nič sole binlo len xbab de'en yo'o lo'o yichjla'ažda'olen' na' bito con ggüiale bi chso'on beṇə' yoblə. Na' gonle bitə'əzə žin yixə' o žin de'e de yo'o can' bento' mendar.

¹² Le'e gon ca' par nič beṇə' ca' cui zjənaquə txen len chio'o bito yesə'əne' mal čele, na' lecəzə par nič cui gaquə fal't šə bi de'en chyažj chchinele.

Can' gaquə catə'an yidə Jesocristən' de'e yoblə

13 Le'egatezə ca' beṇə' bišə', chene'eto' əṇezele can' gac che beṇə' guat ca', beṇə' ca' gwso'onlilažə' Diozən' lao gosə'anite'e yežlyon'. Chene'eto' əṇezelen par ničh cui sole trist ca' tristən' chəsə'anitə' beṇə' yeziqə'əchlə catə' chat no chat čhega'aque' la' cui nite'e lez žžəsyə'əzoe' len Diozən'.

14 Nezecho gwso'ot beṇə' Jeso'osən' na' bebane' ladjo beṇə' guat ca'. Le'egatezə ca' nezecho de que Diozən' gone' par ničh yidə Jeso'osən' de'e yoblə na' nče'e beṇə' ca' bagwsa'at con beṇə' gwso'onlilažə' le'.

15 Na' dižə' nga chzeneto' le'e naquən xtižə' Xancho Jeso'osən' de'en none' mendad gwzeneto'. Chio'o mbancho ṇa'a chonlilažə'əchone', šə ṇe'e mbancho catə'an yide' de'e yoblə, bito ṇacho yobəch yežaglaochone' cle ca' beṇə' ca' bagwsa'at.

16 Na' ca' naquə Xancho Jeso'osən', cuine'en yetje' le'e yoban', na' əṇe' zižjo gone' mendad yesyə'əban beṇə' guat ca', na' to angləblaonə' əṇe', na' yenecho cuež trompet che Diozən'. Nach beṇə' ca' bagwsa'at beṇə' ca' gwso'onlilažə' Cristən' lega'actequē' yesyə'əbane' ladjo beṇə' guat ca'.

17 Na' te na' chio'o chonlilažə'əchone' šə ṇe'e mbancho yežlyo nga, gon Diozən' par ničh txen len lega'aque' šepcho le'e yobanə' to lo'o bejw na' yežaglaoch Xancho Jeso'osən' le'e yobanə'. Nach žžəyechocho len le' zejlīcane.

18 De'e na'anə' ledogwtipəchlažə' ljuežjcho tocho yetocho güe'echo dižə' can' gaquə.

5

1 Beṇə' bišə', bito chyažjen gwzoja' le'e par

gwzenda' le'e bi ža bi orən' yidə Xancho Jeso'osən' yeto.

² Nezele de que gwžin ža əgwnežjue' castigw che beṇə' ca' chso'on de'e malən'. Senyale' lega'aque' can' chon to beṇə' bguan beṇə' chda še'elə.

³ Na' šlac chəsə'əna beṇə' zan: “Mban' zochō, bitobi gaquə checho”, catə' to de repentzə əžin ža əgwnežjue' castigw chega'aque'enə'. Can' chac che no'olə catə' to de'e repentzə chaque' bes che yelə' sannə', ca'atezəczən' gaquə che beṇə' ca' cui zjənitə' probnid catə'an əgwnežjo Xancho Jeso'osən' castigw chega'aque'enə'. Bitō gaquə yoso'oxonje'.

⁴ Pero chio'o beṇə' bišə', chio'o cui nchol yichjla'ažda'ochon', de'e na'anə' bito ədolə'əcho senyal Xancho' chio'o catə'an əžin ža əgwnežjue' castigw che beṇə' ca' cui chso'onlilaže'ene', na' bito gac checho can' chac che beṇə' chzenyal bguanṇə' le' to de repentzə.

⁵ Bayo'o be'eni' che Diozən' lo'o yichjla'aždao' yoguə' chio'o, na' de'e na'anə' bito choncho de'e mal can' chso'on beṇə' ca' ne'e nchol yichjla'ažda'oga'aquen'.

⁶ Cheyalə' gonyanə'əcho xbab naquən' chene'e Diozən' goncho na' ṇabia' cuincho par goncho can' chazlaže'enə' par niçh bito bi gac checho catə' əgwnežjo Xancho Jeso'osən' castigw che beṇə' ca' cui chso'onlilaže'ene'. Beṇə' ca' cui chso'on cas che' gwxaquə'ələbəga'aquene' ca beṇə' zjəntas.

⁷ De'en zjənchol yichjla'ažda'oga'aque'enə' gwxaquə'ələbəga'aquene' ca beṇə' zjəntas na' ca beṇə' chəsə'əzože.

⁸ Pero chio'o bayo'o be'eni' che Diozən' lo'o la'ažda'ochon'. De'e na'anə' cheyalə' ṇabia'

cuincho par goncho can' chazlaže'enə'. Cheyalə' gonlilažə'əcho Diozən' na' gaque che ljuežjcho na' yebeicho de'en nezecho žjəyecho len Diozən'. Šə goncho yoguə' de'e ca' gaquəlenən chio'o par nič bitobi gac checho catə' gwnežjo Xancho Jeso'osən' castigw che beṇə' ca' cui chso'onlilaže'ene'. Gaquəlenən chio'o ca xa soldad de'en naquə de'e ya chaclenən le' par nič cui bi chac che' catə' chdiləlen beṇə' le'.

⁹ Caguə gwlej Diozən' chio'o par nič gone' castigw chechon'. Gwleje' chio'o par nič chonlilažə'əcho Xancho Jesocristən' na' cui yeyejcho lao yi' gabilən'.

¹⁰ Jesocrist na'anə' bnežjw cuine' por ni checho catə'ən gwso'ot beṇə' le' par nič sotezə socho len le' lao mbancho na' leczə ca' catə' bagotcho.

¹¹ De'e na'anə' le'e gwtiplažə' ljuežjle tole yetole na' le'e gaclen ljuežjle par nič sotezə sole gonlilažə'əchle Jesocristən' con can' chonczle.

Pabən' bzejni'ine' beṇə' ca' chso'onlilažə' Jesocristən' can' cheyalə' so'one'

¹² Chatə'əyoito' le'e beṇə' bišə', gapple respet beṇə' ca' chso'on xšin Xancho Jesocristən' entr le'e choso'ogüia choso'oye' le'e na' choso'ozejni'ine' le'e naquən' cheyalə' so cuezle.

¹³ Gapəchguaga'aclene' respet na' gaquəchgüeile chəga'aque' chedə' la' xšin Xancho nan' chso'one'. Na' le'e len lega'aque' le'e so binlo tole yetole.

¹⁴ Le'egatezə ca' beṇə' bišə', le'e güe' consejw beṇə' cui chse'ene so'on žin, na' le'e gwtiplažə' beṇə' chsa'aque'ne' zdebə choso'ozenague' che Jesocristən', na' le'e gaclen beṇə' cuinə'

se'ejni'išaogüe'ene' naquən' cheyalə' so'one'. L̄eso legapə yelə' chxenlažə' len yoguə'əlol beṇə'.

15 Šə bi de'e mal chso'on beṇə' len le'e legon byen cui yoži'ile de'e mal len lega'aque'. Zejli leyeyiljažə' naclən' gonle güen len l̄juežjle tole yetole na' len notə'ətezəchlə beṇə'.

16 Do tyempte le'e yebei.

17 L̄esotezə l̄eso legon orasyon.

18 L̄egüe' yelə' choxcwlen che Diozən' bitə'ətezə de'en chac chele, chedə' can' chene'ene' gon chio'o chonlilažə'əcho Cristo Jeso'osən'.

19 Bito gwžonle gon Spirit che Diozən' can' chene'en len le'e o len beṇə' yoblə.

20 Le'e gon xbab de que to de'e zaque'e chso'on beṇə' chəsə'əyixjui'e de'en bagož Diozən' lega'aque'.

21 Na' legonyanə' xbab che yoguə'əlol dižə' de'en chso'e par ničh gonen chele yoguə' de'en naquə güen.

22 Na' bito gonle bitə'ətezə de'e naquə de'e mal.

23 Diozən' chone' ca chzo chbezcho binlo len xbab de'en yo'o lo'o yichjla'ažda'ochon'. Na' chnabda'ane' gone' par ničh gacle beṇə' la'aždao' xi'ilažə'. Na' leczə gonšgue' par ničh bito bi de'e mal gonle len yichjla'ažda'olen' na' nic len cuerp chelen' par ničh bito bi dolə' gapple catə'en yidə Xancho Jesocristən' yeto.

24 Diozən' ben' bagwleje' chio'o par naccho xi'ine' chone' complir can' ne'enə', na' de'e na'anə' gone' par ničh güe'elažə'əle gonle can' chazlaže'enə', na' gone' par ničh cui gapple dolə'.

Pabən' gwnabe' gaquəlen Diozən' beṇə' Tesalonica ca'

25 **Be**ṇə' bišə' le'e so le'e gon orasyon par neto'.

26 Na' catə' chežagle leyolgüiž ljuežjle dižə' šao' par nič gacbia' de que chaque che ljuežjle.

27 Can' na Xancho Jesocristən', chona' mendad gwlabable cart nga par əse'ene yoguə'əloḷ beṇə' bišə'əcho ca' nitə' gan' zolenə'.

28 Na' sotezə sošga Xancho Jesocristən' gaquəlenšgue' le'e. De'e na'azən' chzoja' ŋa'a. *Pab*

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d439ce34-67af-5db7-b82c-f44ad9932db2